

Шырақбек Қабылбаевтың есімі берілді

Қазақстан Республикасы Ішкі істер министрлігі Қостанай академиясына мемлекет және қоғам қайраткері, ішкі істер генерал-лейтенанты Шырақбек Қабылбайұлы Қабылбаевтың есімі берілді.

Алаштың аяулы азаматы, мемлекет және қоғам қайраткері, ішкі істер генерал-лейтенанты Шырақбек Қабылбайұлы Қабылбаевтың есімі бүгінгі таңда Қазақстан Республикасы Ішкі істер министрлігі Қостанай академиясына берілді.



Бұл Қазақстан Республикасы ІІМ Қостанай академиясы жоғары ведомстволық оқу орнының профессорлық-оқытушылар құрамы, қызметкерлер мен тыңдаушылар үшін қуанышты да ерекше күн.

Шырақбек Қабылбайұлы Қабылбаевтың өмірбаяны мен қызмет жолдары туралы айтсақ, ол 1908 жылы Семей облысының Абыралы ауданындағы Қайнар ауылының Қарашоқы деген жерде кедей отбасында дүниеге келген. Жастайынан зардап шеккен ол, ауыл мектебінде

білім алады.

1931 жылы Семипалатинск педагогикалық техникумына түсіп, оны үздік аяқтайды. 1932 жылы әскерге шақырылып, Алматы аласына орналасқан қазақ ұлттық атты әскер полкінің құрамында жауынгерлік дайындықтан өтеді. Армия қатарындағы қызметі аяқталысымен Ш. Қабылбаевтың ГПУ - НКВД жүйесіндегі қызметтерге тартылып, арнайы курстарда оқиды.

1934-1938 жылдары ГПУ - НКВД жедел жұмыстарында қызмет атқарған, ал 1938—1954 жылдары Қазақстан Компартиясы Орталық Комитетінің аппаратында ұзақ жылдар бойы жауапты қызметте қызмет атқарған. Бұл жерде ол, Орталық Комитеті хатшысының көмекшісінен әкімшілік және сауда қаржы органдары бөлімінің меңгерушісіне дейін өзінің еңбек етуінің арқасында жеткен. Ш.Қабылбаев қызмет бабында елдің тарихын аралап мағлұматтар жинаған жан.

Бәрімізге мәлім, 50-ші жылдарының бас кезінде совет елдері үшін түбірлі өзгерістер болған жылдар, дәлірек айтқанда, Орталық және жергілікті жерлерде билік пен басқарма жүйесінің кадрлары жаңартылып, әлеуметтік – саясаты жағынан қиын болған.

1954 жылдың тамыз айында Қазақстан Компартиясының Орталық Комитетінің шешімі бойынша Ш.Қабылбаев ішкі істер министрі болып тағайындалды. Осы жылдары ішкі істер органдарының жүйесі ең қиын жағдайда еді, өйткені кәсіби мамандар, қызметтік бөлмелер, тұрғындар жетіспеген болатын. Материалдық-техникалық база да төмен болған.

Осындай қиын жылдарда қызмет атқарып, сабырлық танытып, алға мақсаттар мен міндеттер қойып, өзінің күш-жігерлігімен және табандылығымен жұмысқа жұмыла кіріскен қызметкер.

1959 жылы болған Теміртау оқиғасына байланысты Ш.Қабылбаев жазықсыз жазғырылып орнынан босатылады. Бірақ, арада біраз жылдар өткен соң, 1967 жылы ол екінші рет Қазақ КСР Ішкі істер министрі болып тағайындалады.

Ш.Қабылбаевтың басқару кезінде алғаш рет күрделі құрылыс басқармасы құрылды, жеке өндірістік база және мердігерлік құрылыс ұйымдары пайда болды. Автокөлік жол құрылыстары белсенді жұмыс жүргізді. ИМ тас жол құрылысы бойынша арнайы басқарма базасында Қазақстанның министрлік автокөлік жолы құрылған.

Ш. Қабылбаев өзіне тән қайраттылығымен, ашықтығымен сол уақытта милицияда қызмет атқарып жатқан қызметкерлердің жалақысын көтеруге, жаңа нысанды киім-кешек енгізуге және милиция қызметкерлерінің беделін жоғарылатуға, әлеуметтік қамтамасыз етуін жақсартуға тырысты.

Сондай-ақ, Ш.Қабылбаев 60-қа жуық түзету-еңбек колонияларында ұсталынған сотталғандарды еңбекпен тәрбиелеу арқылы оларды тура жолға қою міндетін де жемісті шешіп, сотталғандарға орта білім мен мамандық алуына мүмкіндік берді.

Осындай адамгершілік қасиеттері мол, білімді, қайраттылығымен, табандылығымен қиын жағдайларда алға қойған мақсаттары мен міндеттерін жемісті орындап, өзін нағыз басшы екендігін мойындады. Ол тек қана адал, тәртіпті, өзіне және бағынысындағыларға талап қоятын, әділ де қамқор басшы ретінде көрсете білді.

Шығармашылық жағынан да, Ш. Қабылбаев қазақ және орыстың классикалық әдебиетін тамаша білген, өзінің танымал жерлесі Абайды құмарта оқыған, ол көптеген қазақтың жазушыларымен басқа да шығармашыл қызметкерлермен де дос болған.

Сондай-ақ, сол уақыттың өзінде Ш.Қабылбаевтың мақалалары – «Синие шинели», «Преступления могло не быть», «Особое назначение», «Бессонный патруль» әрқайсысы 300-400 мың данада басылып шыққан.

Қызметін адал орындап, еңбекқорлығының арқасында Ленин, Еңбек Қызыл Ту, Қызыл Жұлдыз ордендерімен, басқа да медальдармен марапатталды. Қазақ КСР Жоғары Советінің Құрмет грамотасымен, «КСРО ИМ құрметті қызметкер» белгісімен марапатталған азамат.

Ш.Қабылбаев 1976 жылы 5 шілдеде дүниеден өтті.

Ел алдындағы Ш.Қ.Қабылбаевтың қызметін және оның ішкі істер органдары саласындағы мемлекеттік және кадрлық саясатын жетілдіруге қосқан үлесін ескере отырып, 2014 жылғы 9 желтоқсанда Қазақстан Республикасы Үкіметінің №1287 Қаулысымен және мәңгі есте қалдыру мақсатында Қазақстан Республикасы ИМ Қостанай академиясына Ш.Қабылбаевтың құрметті есімі берілді.

Оның өмірлік жолы, Отанға адал қызмет етуі ИО болашақ ұрпақтары үшін жақсы үлгі болады, ал кәсіби тәжірибесі мен нақты істері Қазақстанның құқықтық және демократиялық даму барысында алға қойған мақсаттары мен

міндеттерін орындауда қажет деп есептеймін. Сондай-ақ, мемлекет және қоғам қайраткері, ішкі істер генерал-лейтенанты Шырақбек Қабылбайұлы Қабылбаев ағамызға ұқсап, генерал болуды әр қызметкер армандайды.

Бүгінгі таңда, Қазақстан Республикасы ІІМ Қостанай академиясында тәрбиеленіп, білім нәрін алып жатқан әр тыңдаушы, дәлірек айтқанда профессорлық – оқытушылар құрамы, қызметкерлер, болашақ офицерлер отаны, туған жері үшін, қызметтік борыштарын мүлтіксіз орындап, ұлағатты адамның іс-тәжірибесін үлгі – өнеге ретінде тануы қажет.

Орынбасар Уақпаева
ҚР ІІМ Қостанай академиясының
Баспасөз қызметі